

四庫全書

子部

欽定四庫全書

子部

古今事文類聚前集卷四十九

詳校官中書<sub>臣</sub>康綸鈞

侍讀<sub>臣</sub>孫球覆勘

總校官編修<sub>臣</sub>王燕緒

校對官編修<sub>臣</sub>沈清藻

謄錄監生<sub>臣</sub>施華

欽定四庫全書

古今事文類聚前集卷四十九

宋 祝穆 撰

喪事部

國哀

羣書要語天子死曰崩

曲禮

告喪曰天王登假

音霞

措之廟

立之主曰帝

同上

其死登假三年而形遜

莊子

楚辭遠遊云

載營魄而登霞兮掩浮雲而上征朱氏注曰霞與遐同

猶曰適遠云爾曲禮告喪之辭乃又借以為死之美稱

莊子作登假蓋亦此例但此篇注者遂解赤黃之氣釋

莊音又讀假為格而訓至焉則其誤愈遠矣辨證周書曰

諡者行之跡是以大行下孟反受大名細行受細名李善文選

注皇帝新崩未有定諡故總其名曰大行皇帝風俗通千

歲厭世而去乘彼白雲遊于帝鄉莊子宮車晏駕注天子

當晨起早作而方崩殞故稱晏駕者凡臣子之心猶謂

宮車晚出也漢天志賈誼疏曰朝委裘而天下不亂孟康

曰委裘若容衣天子未坐朝事先帝衣裘也

漢書

古今事實

鼎湖攀龍

黃帝采首陽山銅鑄鼎於荆山下鼎既成有龍垂胡髯  
下迎黃帝黃帝上騎羣臣後宮從上龍七十餘人龍迺  
上去餘小臣不得已乃悉持龍髯拔墮黃帝弓百姓仰  
望黃帝既上天乃抱其弓與龍髯號故後世名其處曰

鼎湖其弓曰烏號

漢郊祀志

如喪考妣

舜二十有八載堯乃殂落百姓如喪考妣三年四海遏

密八音書舜  
典

降割我家

武王崩周公相成王作大誥王若曰猷大誥爾多邦越  
爾御事弗弔天降割于我家不少延洪惟我幼冲人嗣  
無疆大歷服已予惟小子若涉淵水予惟徃求朕攸濟

嬛嬛在疚

閔予小子嗣王謀於廟也閔予小子遭家不造嬛嬛在  
疚於乎皇考永世克孝念茲皇祖陟降庭止維予小子  
夙夜敬止於乎皇王繼序思不忘

未堪家難

訪落嗣王謀於廟也訪予落止率時昭考於乎悠哉朕  
未有艾予將就之繼猶判渙維予小子未堪家多難紹  
庭上下陟降厥家休我皇考以保明其身

病既彌留

成王將崩命召公畢公率諸侯相康王作顧命王曰嗚呼疾大漸惟幾病日臻既彌留恐不獲誓言嗣茲予審訓命汝用敬保元子釗弘濟于艱難茲既受命還出綴衣于庭越翌日乙丑王崩

沒於祗宮

穆王欲肆其心周行天下祭公謀父作祈招之詩以正王心王是以獲沒於祗宮注祈父周司馬掌甲兵之職招其名獲沒謂免篡弑

即位而哭

滕定公薨世子使然友之鄒問於孟子孟子曰三年之喪齊疏之服飭粥之食自天子達於庶人三代共之然友定為三年之喪父兄百官皆不欲然友復之鄒問於孟子孟子曰然不可以他求者也孔子曰君薨聽於冢宰啜粥面深墨即位而哭百官有司莫敢不哀先之也有上好者下必有甚焉者也是在世子然友反命世子曰然是誠在我五月居廬未有命戒百官族人可謂曰

知及至葬四方來觀之顏色之戚哭泣之哀弔者大悅

尸蟲出戶

十月乙亥齊桓公卒易牙立公子無詭太子昭奔宋桓公病五公子各樹黨爭立及桓公卒遂相攻以故宮中空莫敢棺桓公尸在牀上六十七日尸蟲出于戶十二月乙亥無詭立乃棺赴辛巳夜斂殯

祖龍死

秦使者從關東夜過華陰平舒道有人持璧遮使者曰

為吾遺瀉池君

水神也秦以水德始皇將終故其水神自相告

因言曰今年祖

龍死

祖始也龍人君象謂始皇也

使者奉璧具以聞始皇默然曰山

鬼不過知一歲事也

### 車載鮑魚

秦始皇崩於沙丘李斯以上崩在外不發喪載輜車中  
輜車臭詔從官令載鮑魚一石亂其臭

### 誣以飾貌

順帝朝有希梁冀旨共作飛章虛誣李固罪曰大行在

殞路人掩涕固獨胡粉飾貌搔頭弄姿後冀畏固名德  
更奏前事遂誅之

女簪白花

晉杜皇后預之曾孫先是三吳女子相與簪白花望之  
如素柰傳言天公織女死為之著服至是而后崩

帝持心喪

仁廟聖誕乃李淑妃也諡章懿太后晏殊撰碑薨時上  
幼章獻養為已子雖上亦不知也及即位章獻稱制而

楊太后病革上問疾楊密語其事上大慟即見執政欲

行服章獻難之於是持心喪

孫公談圖

古今文集

雜著

卞太后誄

曹植

率土噴薄三光改度陵頽谷踊五行牙錯皇室蕭條羽  
檄四布百姓戲歆嬰兒號慕若喪考妣天下縞素聖者  
知命殉道寶名義之攸在亦棄厥生敢揚后德表之旒

旌光垂罔極以慰我情乃作誄曰我皇之生神靈是輔  
作合于魏亦光聖武篤生帝文紹虞之緒龍飛紫宸奄  
有九土詳惟聖善岐嶷秀出德配姜嫄不忝先哲元覽  
萬機兼才備藝汎納容衆含垢藏疾仰奉諸姑降接儔  
列陰處陽觀潛明內察及踐大位母養萬國溫溫其仁  
不替明德悼彼邊氓未遑宴息恒勞庶事兢兢翼翼親  
桑蠶館為天下式樊姬霸楚書載其庸武王有亂孔歎  
其功我后齊聖克暢丹聰不出房闥心照萬邦年踰耳

順乾乾匪倦珠玉不玩躬御綈練日昃忘饑臨樂勿聽  
去奢即儉曠世作顯慎終如始蹈和履真恭事神祇昭  
奉百靈跼天跼地祇畏神明敬微慎獨執禮幽冥虔肅  
宗廟蠲薦三牲降福無疆祝云其誠宜享斯祐蒙祉自  
天何圖凶咎不勉斯年嘗禱盡禮有篤無痊豈命有終  
神食其言遺誥在疚承諱東藩擗踴郊畛灑淚中原追  
號皇妣棄我何遷音垂顧復今何不然空宮寥廓棟宇  
無烟巡省階途髣髴樞軒仰瞻帷幄俯察几筵物不毀

故而不存痛莫酷斯彼蒼者天遂臻魏都遊魂舊邑  
大隧開塗靈將斯戢歎息霧興揮淚雨集徘徊輻輳  
眇弗及神光既幽佇立以泣

齊敬皇后哀策文

謝玄暉

惟永泰元年秋九月朔日敬皇后梓宮啟自先塋將祔  
于某陵其日至尊親奉奠某皇帝乃使兼太尉某設祖  
于行宮禮也翠帟舒阜玄堂啟扉俎徹三獻筵卷六衣  
哀子嗣皇帝懷蜃衛而延首想鷺輅而撫心痛椒塗之

先廓哀長信之莫臨身隔兩赴時無二展

省視也

旋詔左

言光敷聖善其辭曰

帝唐遠胄御龍遙緒在秦作劉在漢開楚肇惟淑聖克

柔克令清漢表靈魯

高也

沙膺慶爰定厥祥徽音允穆光

華沼沚榮耀中谷敬始紘緼教先種稷稭問川流神襟

蘭郁先德韜光君道方被于佐求賢在謁無訛顧史弘

式陳詩展義厚下曰仁藏往伊智十亂斯俟四教罔忒

思媚諸姑貽我嬪則化自公宮遠被南國軒曜

軒輊星女王星

也懷光素舒佇德閔予不祐慈訓早違方年冲藐懷袖  
靡依家臻寶業身嗣昌輝壽宮寂遠清廟虛歸嗚呼哀  
哉帝遷明命民神胥悅乾景外臨陰儀內缺空慙故劍  
徒嗟金穴璋瓚奚獻禕褕罔設嗚呼哀哉馮相告祲宸  
駕長往貽厥遠圖末命是獎懷豐沛之綢繆兮背神京  
之弘敞陋蒼梧之不從兮遵鮒隅以同壤嗚呼哀哉陳  
象設於園寢兮映輿鍔於松楸望承明而不入兮度清  
洛而南游繼池綽於通軌兮接龍帷於造舟迴塘寂其

已暮兮東川澹而不流  
嗚呼哀哉藉閔宮之遠烈兮聞  
續女之遐慶始協德於蘋蘩兮終配祀而表命慕方經  
於賜衣兮哀日隆於撫鏡思寒泉之罔極兮託彤管於  
遺詠嗚呼哀哉

昭明太子哀冊

梁王均

蜃輅戕戕龍驂跼步羽翹前駟雲旗北徕皇帝哀繼明  
之寢曜痛嗣德之徂芳御武帳而悽慟臨甲觀而增傷  
式稽令典載揚鴻烈詔撰德於銘旌永傳徽於舞綴其

辭曰

式載明兩實惟少陽儀天比峻儼景騰光睿哲膺期旦  
暮斯在識洞機深量包瀛海立德不器至功弗宰寬綽  
居心溫恭成性脩禱孝友率由嚴敬咸有種德惠和齊  
聖括囊流略包舉藝文徧該絢素殫極丘墳騰褰充積  
儒墨區分瞻河闡訓望魯揚芬雲物告徵祲沴褰象星  
霾恒曜山頽朽壤威儀上賓德音長往具僚無蔭諮承  
安仰嗚呼哀哉首夏司開麥秋紀節容衛徒警青華萎

絕書幌空張談筵罷設虛饋饒饒孤燈翳翳嗚呼哀哉  
簡辰請日筮合龜貞幽挺夙啓玄宮獻成武校齊列文  
物增明昔遊漳水賓從無聲今歸郊郭徒御相驚嗚呼  
哀哉背絳闕以遠徂輔青門而徐轉顧馳道而詎前望  
國都而不踐渡脩坂之威夷遡平原之悠緬驥蹠足以  
酸嘶挽淒鏘而流泣嗚呼哀哉混哀音於蕭籟變愁容  
於天日雖夏木之森陰乃寒林之蕭瑟既將反而復疑  
如有求而遂失謂天地其無心遽永潛於哀質嗚呼哀

哉

唐憲宗章武皇帝哀冊文 令狐楚

維元和十五年歲次庚子正月甲戌朔二十七日庚子  
移殯於大內太極殿之西階粵五月十五日庚申遷座  
於景陵禮也玉衡南指金波西落皓雪集其麻衣素雲  
褰其綃幕柳宮龍動竹池魚躍兆庶雨泣於浩穰萬靈  
風號於寥廓哀子嗣皇帝仰攀雕輦殷奠瓊筵哀無容  
以觸地痛不返而終天仙仗徐進宸儀永隔降輿旨於

鸞臺揚聖功於鳳冊其詞曰

配天惟后伊祁同光應道為帝元元之系聖人有作孝  
子善繼顯赫十朝總齊四裔執其大象司彼左契武烈  
誕敷文明下濟出潛離隱或躍未融親則盤石封殊剪  
桐承桃黃屋主鬯青宮禮樂盡在謳歌薦至軒皇勸勤  
傳付神器太母侍養親臨寶位怡聲下色先意承志家  
令敢言天子屏貴明明出震業業承乾其仁如山其智  
如泉理折豎白學探幽玄揮毫霧動揆藻霞鮮所持者

儉所寶者賢刑靡不省賞無不延冕旒迎日珪璧祈年  
涕謁宗廟臣朝昊天縱神聖日躋孝敬鴻名既加寶  
厯一定窮人屢賑名士交聘獸愛觸邪草憐指佞梯航  
脩貢鱗羽遂信河色呈符山聲告慶編書辯謗創殿思  
政甘節必稱苦言終聽稜威之加德政之盛霜雪憲章  
雷風號令夏臺齒劍上黨納奔趙際宅心鄴中聽命誰  
能去兵王者有征玉壘霧廓金陵鏡清狐鳴上蔡蟻聚  
東平伏鎖就戮迴戈受烹始以止殺歸於好生恢恢不

識蕩蕩難名信及隱微道存溥博走馬斯却昆蟲咸若  
調其王燭狗似木鐸混同車書遠頌正朔範金合土大  
興太學清蹕鳴鑾將登高嶽四維既張五刃已藏蠻夷  
戎羌敢不來王天下清靜朝廷樂康會冠劍以高宴戲  
魚龍於廣場有嚴有翼無怠無荒俗皆臻於壽域人自  
為於羲皇日出入兮安窮極雲飛揚兮無處所瑞方瞻  
乎鳳來災忽聞於鶴語謂百年之可卜嗟九齡之不與  
當凝旒而下臨奄脫屣以輕舉萬姓哀其考喪千官懷

其后撫封人猶祝於南山帝子已號於北渚嗚呼哀哉  
披靈衣兮如在委仙佩兮若休遺環海以靜寐謝鼎湖  
而遠遊桂華朗兮高殿寂梧葉暗兮深宮愁驚同軌之  
遽至咽長川而不流嗚呼哀哉威儀肅設文物前列酌  
玉斚以宵奠駕金根而曉發出朱雀之正門背青鸞之  
迴闕逶迤原野蒼茫日月去復去兮降堯階悲莫悲兮  
臨禹穴嗚呼哀哉地開蒼谷天作豐山江海自流於泉  
下城郭取象於人間高封焉鬣永祕龍顏鱗有逆兮會

觸髯欲升兮尚攀朝百靈以肅肅遺八駿以閑閑陵植  
栢兮未拱閣生苔兮已斑嚴日宮而深閉藹雲幄以空  
還興衆感於萬井結宸悲於九閭嗚呼哀哉神行無方  
乾健不息物皆被於聖澤人自遂於帝力魏乎高代之  
行至矣動天之德後元壤以長存冠蒼穹而罔極嗚呼  
哀哉

慰國哀

余讀魏氏雜編見真宗時公卿大夫慰國哀登極往還

書蓋大臣同憂戚宜有慶弔往在南都奉神宗諱見蘇  
尚書作本路發運帖莫知當慰與否也相與商論竟復  
中輟乃知前輩禮法猶在而近世士大夫之寡聞也因  
錄之寇侍郎慰書曰伏以  
大行皇帝奄棄萬邦天下臣  
子畢同號慕昔同華綴俱受異恩攀靈馭以無繇望天  
顏而永訣萬纏悲緒遽奉台函摧咽之誠倍萬常品賀  
書曰伏以聖人出震大明初耀於四方王澤如春普慶  
俄頒於九有凡在照臨之下畢同歡忭之心侍郎久滯

外藩已成美政廊廟佇徵於舊德雲雷始洽於新恩未  
果馳誠先蒙飛翰感銘忻慰無以喻名

后山  
叢談

### 布四腳加冠

司馬溫公云仁宗崩有司用乾興故事群臣布四腳加  
冠於是時莫識其制以幅巾冪首破其後為四腳其後  
鄭毅夫讀續事始云三代黔首以皂綃裹髮周武帝裁  
為四腳名以幞頭馬周請重繫前腳盖布四腳皆後垂  
如周制遇暑則繫其前脚如唐制英宗崩宋次道誤為

布幘頭有司遂用民間暮喪之服以今漆紗幘頭去其鐵脚而布裹之前繫後垂而不可加冠壞之而冠幘頭之失自次道始也余謂四脚加冠今士大夫喪冠是也大布之冠古也四脚今也於禮為繁矣

同上

太上皇帝上僊慰皇帝表 周必大

天心難測邦禍荐臻甫涉夏秋而喪考妣

中慰

臣竊以慈

懿寢園之奉翼馭將歸聖安丹鼎之成龍胡以斷黎庶攀號而不釋聖神悲痛以何堪恭惟陛下孝通神明躬

侍寢膳大舜終身之慕每竭誠心有唐二聖之歡方隆  
榮養驟惟變故諒極哀恫願寬銜恤之情毋爽宅憂之  
禮臣退休田里阻詣宮庭臣無任云

孝宗登遐慰皇帝表

趙汝談

聖君侍膳方伸永命之新天父登遐忽下過音之詔痛  
結嚴宸之遽哀纏率土之濱中恭以尊號德合民心仁

根天性陟帝位二十八載高蹈勸勤至寢門一日三朝  
久膺隆養福共期於壽考疾俄殆於寤興設黼宸於牖

間惟聞末命乘白雲於帝所恍隔真遊撫弓劍以空存  
視羹牆而猶見恭惟陛下睿思罔極孝慕素深問安節  
以色憂不能正履宅亮陰而思道茲故弗言願懷繼志  
之圖少抑終身之戚臣忝紆郡綬邈在海壖驚奉諱音  
徒結攀號之戀坐縻官爵莫伸奔問之誠

寧宗升遐慰皇帝表

趙汝談

皇穹弗弔降此鞠凶黎民何辜罹此荼毒

中慰

伏以大行

皇帝撫億兆衆踰三十年仁慈結乎人心恭儉根於天

性清淨無作神明為徒故能消巨患若渙冰除宿奸如  
棄唾宗社祇叶朝野宴寧陟方奄聞率土震動恭惟陛  
下越自藩邸入承廟祧亭育之恩深付託之器重孝思  
方切悲慕奚任然而綴衣于庭群公既皆聽命即位而  
哭百官莫敢不哀少抑至情永綏大業

寧宗升遐慰皇太后表 趙汝談

顥蒼降割宸極登遐羣方震驚萬眾號絕

中恭惟太皇

太后陛下陰陽合德夙夜同心勩相歷年順成多慶驟

罹禍棘諒劇悲摧願裁弓劍之思勉副簾帷之託

皇太后升遐慰皇帝表 周必大

慈帷晝掩哀訃夕聞凡思持載之功舉抱摧傷之痛

中慰

恭惟陛下事親盡禮侍膳殫誠久承文母之歡徽音遽隔遠邁顯宗之孝追慕何窮願寬陟謁之悲少副普天之望

皇太后升遐慰皇帝表 周必大

轍結東朝悲纏中夏遙知晬穆正切哀恫

中慰

恭惟陛下

性本自天行皆高世漢文至孝晨昏無解帶之安虞舜  
好生遠邇釋畫冠之禁既勤施德可謂寧親脩聞厚地  
之傾莫曉彼蒼之意須思適變毋致過哀上以符慈寧  
治命之言下以副黎庶誠心之懇

壽仁太上皇后上仙慰皇帝表

周必大

灾纏長樂悲動嚴衷

中慰

伏以尊號沙麓儲祥河洲協詠

勤宣婦道誕育聖躬恭惟陛下欽念母慈備彰誠孝宮

中自行三載之制天下咸識一人之心願寬罔極之哀  
永御無疆之厯臣恨以退伏田里不獲奔赴宮闈臣無  
任云云

皇后上仙慰皇帝表

周必大

桂輪隱耀椒掖廡儀厚載既傾淵衷斯惻中伏以大行  
皇后天姿恭儉地望高華義殫婦順之勞正倚坤寧之  
助奄從先后莫返中闈恭惟陛下孝切亮陰思隆儷極  
雖聖情之易感故天數之難移願寬當宁之思垂副含

生之望臣退居田里阻造宮庭臣無任云云

孝宗梓宮啓殯慰皇帝表 周必大

舜三年之喪脩臨襄葬商兩楹之殯初啓叢塗痛結重  
宸悲纏率土中慰恭惟太上皇帝陛下孝思罔極宸禮無

違雖恭默弗言若已忘於天下然齊䟽躬服自不廢於  
宮中願紓追慕之懷益盡送終之典臣効官踈遠奉報  
驚摧莫伸同軌之駿奔徒隕交頤之涕泗

顯仁太后發引慰皇帝表 周必大

陟彼屺兮爰卜青烏之吉維其時矣遽瞻畫翬之行祖

道逶迤聖情惻楚

慰

恭惟陛下德鍾天性道貫人倫粵

符素奈之謠深切蓼莪之感親喪固所自盡也內不廢  
於三年聖德何加於孝乎外已形於四海逮茲遣奠尤  
極哀悰顧淑靈已隔於東朝惟追慕少寬於南面

同前

周必大

龜猶告吉翟駕即塗念慈矩之長違知聖情之永慕

慰中

恭惟陛下高行超於今古純誠貫于神明自罹文母之

哀益顯有虞之孝送終盡禮遣奠及期瞻披紼之在庭  
宜枯園之增感願副群生之望少寬罔極之懷

寧宗發引慰皇帝表

龜筮協從既先於遠日龍輶就祖已次於近郊罄海宇  
以悲摧極乾坤之悽愴中慰恭惟陛下作民明辟執古通  
喪致堯之思於羹牆而如見盡舜之孝豈富貴之解憂  
屆七月之有期增九重之永慕臣輸將無補扈從有行  
臨表涕零實難忘於忠戀承桃體重願少抑於聖懷

寧宗發引慰皇太后表

官車晏駕考卜因山廠衛夙嚴屬引載道罄萬方而永

慕悵七月之有期

中慰

恭惟陛下以母儀之尊盡婦道之

順鷄鳴警戒憶往日以增悲龍駕飄搖痛終天之永訣

前同

英宗掩殯慰皇帝表

王安石

須百禩之材已襄塋故設九虞之主方考祔儀

中慰恭惟

陛下德茂欽明道隆勤孝雖送終之禮已備而追遠之

念甫深惟順變以節哀實含生之至願臣限分鎮守阻  
預朝班

同前慰太皇太后牋

王安石

宮車云返陵邑既營凡在照臨豈勝摧慕伏惟殿下道  
侔坤育仁出天成永懷愛孝之隆尤積悲恫之感稍舒  
慈念實慰輿情臣叨備從官限分符守徒有攀號之至  
痛初無辦護之微勞

太皇太后掩殯慰皇帝表 周必大

駟馭上賓武帳久虛於長樂龜猶未諗容衣遂閔於稽  
山一人嗟慈範之違萬國嘆坤儀之遠中恭惟陛下純  
誠冠古至行積中慕親之心未嘗息焉執喪之禮可謂  
盡矣神靈為之顯相天日至於晏溫用葛無麻蓋異魯  
君之母因山配地實同唐室之規仙寢既成真游莫返  
追懷聖善固益動於孝心俯為邦家當勉裁於哀慕

同前

周必大

日月有期爰畢因山之制寢園在望共勤陟謁之瞻追

懷太妣之徽音益惻武王之達孝恭惟陛下德隆天性  
念極母儀既哀戚之內深亦禮文之外盡為之宅兆奉  
長樂之禕衣見于著龜祔裕陵之吉壤逮茲甫窆孰不  
纏悲雖上聖甄甄痛長違於慈矩然下民惻惻願勉抑  
於至情

寧宗掩殯慰皇帝表

禹穴因山令圖改卜漢陵復土大事既襄凡戴照臨舉  
深摧咽中慰共以諡號皇帝休功邁世至仁如天方垂衣

以致太平迺脫躡而超萬乘六飛八駿尚仙馭之來歸  
萬歲千秋竟神遊之永閔恭惟陛下義隆送往孝極奉  
先慨日月之有期脩寢園之告脩臣將指扈送引睇闕  
庭鍾慶發祥已兆龍岡之吉節哀順變願儲蠖濩之思

同前慰太皇太后表

橋山弗返遺弓劍於軒臺茂陵初成閔衣冠於漢殿悲  
纏九土哀慟六宮慰中恭以諡號皇帝繼統百王承休累  
聖華封有請共擬祝於堯年梧野陟方乃竟成於舜塋

恭惟陛下覩天作合儷極居尊屬時大事之襄彌劇慈

懷之感臣

同前

太上皇帝掩殯慰皇后牋

虞帝陟方狩已迷於梧野太公卜莖役始就於櫟陽復

土言遄望雲靡及

中慰

切以尊號儲精物表玩化天倪太

山其頽驗孔聖兩楹之奠祈招不作信穆王八駿之遊

茲永閔於慈顏宜有傷於冲抱恭惟陛下順成靡倦定

省弗違婦子熙熙尚憶椒盤之奉山川鬱鬱空聞曆主

之歸永懷如在之靈豈曰無從之涕伏望茂加節抑勿  
過憂傷惟孝道之大端初不專於哭踊況王心之鉅創尤  
所賴於慰寬

太皇太后掩殯慰皇帝表

兵衛載廠風靜胥江之浪輶車已窆雲深禹會之山甫  
周復土之儀益重居廬之感中伏以諡號蚤推食淡晚

樂含飴厭代賓仙棄四海九州之養因山定制妥千秋  
萬歲之靈仙馭莫追淵衷永惻恭惟陛下仁心內恕德

教旁加稱孝孫稱哀孫不忘繼志讀喪禮讀祭禮尤謹  
送終既永傷而永懷且如疑而如慕伏願為宗祊而自  
重順時變以安行謂塋曰藏既克襄於大事至禮而止  
更節抑於餘哀

英宗祔廟慰皇帝表

王安石

七月而塋既克奉於寢園萬世不祧遂崇成於宗廟凡  
居覆燾同盡攀號中慰伏惟陛下膺保聖神踐行仁孝纏  
哀固極率禮無違仙遊既集於宗祊聖念彌勤於翼室

仰祈順變俯矐含生臣符守所櫻班朝莫預臣無任云云

同前慰太后表

王安石

威靈有集方祔於廟祧感慕無窮外覃於蠻貊中伏惟慰

殿下比賢任如膺慶塗莘祗協孫謀克襄大事地非蒼梧之遠勢有灞陵之安唯割至文尚膺遐福臣脩官有守奔問無階

太皇太后祔廟慰皇帝表 周必大

設祭以虞久駐言歸之馭祔姑而祀永綏如在之靈通  
觀彛典之成彌顯聖人之孝中恭惟陛下行為世法性  
本生知宅憂每越於常情制禮率遵於故事瞻文王之  
清廟久矣寧神顧太妣之徽音茲焉登配既送終之無  
憾在追遠以宜寬臣無任

太皇太后祔廟慰皇帝表 周必大

繫主來歸既講九虞之祭椒塗永閔遂參諸后之游悲  
動紫宸禮嚴清廟中恭惟陛下誠通幽顯道述祖宗問

寢承顏事母昔同於事地謹終追遠寧親今至於寧神  
雖云彞訓之遵時乃明王之孝閔宮有洫已聞升祔於  
姜嫄南面何為願節哀恫於虞舜

慈烈皇后祔廟慰壽成太后牋

事嚴塋聖甫畢於山陵禮重祔姑益尊於宗廟聿隆安  
奉深示顯承中慰切以尊號位歷四朝謀詒萬世寶慈建

極尚垂坤厚之光精爽在天宜正渙亨之假恭惟殿下  
巍巍冲德翼翼孝誠如慕如疑獨厚送終之意以享以

祀式嚴升配之儀諒因制寢之成益重視奩之感願稽  
國典少釋聖懷雨露既濡雖未忘於悽愴春秋而祭尚  
少慰於哀思

同前慰太上皇后牋

易名以諡備極於尊崇卒哭而虞式嚴於升祔道全欽  
愛孝達幽明中切以尊號天壽九齡母儀四世三十五

載享榮養於東朝億萬斯年妥明靈於大寶恭惟殿下  
適追在念思媚有懷喪紀不忘儼憂服於几筵之次禮

文是守寓敬心於宗廟之中適殿典之載陳諒忱情之  
有惻願循至理更節餘哀丕顯丕承庸盡如生之事以  
享以祀尚寬將見之思臣無任云云

寧宗祔廟慰皇帝表

殿衛反虞九筵載秩宗祔升祔萬世不祧中慰恭以諡號  
靈德在天曆謨垂世鼎湖弓劍已迄大事之襄高廟衣  
冠再修崇儀之奉昭穆以序妥侑惟時恭惟陛下若稽  
大猷荅揚先訓主鬯以承祭祀於昭震濬之符假廟以

致精神深明萃聚之義既右烈考載陟新宮寧親大於  
寧神既率先於孝治盡倫從而盡制願俯就於禮經少  
抑哀思以祚羣品

同前慰皇太后表

梓宮就殯桑主返虞宗萬世以不祧祔九廟而為穆中慰

恭以諡號恩覃有截德合無疆翠栢留陰悲茂陵之秋  
夕朱櫻乍薦驚原廟之春嘗恭惟陛下盡志謹終永懷  
追遠悵天容之遂隔諒聖情之難居願推禮制之宜少

抑哀思之過共建皇極永祚生靈

卒哭慰皇太后表

僊游寢邈難忘必世之仁天運既更奄及踰時之慕慨  
喪事之即遠知聖情之難居慰中恭惟陛下德合無疆功  
高邃古泰通以治錯海內於久安謙尊而光有天下而  
不與義雖隆於伉儷禮當酌於權宜願錫福於含生以  
節哀而順變

同前慰皇帝表

龍湖莫返一以遠於僊游駒隙易馳十遂周於旬晷感  
時增疚率土同情中慰恭惟陛下嗣服無疆繼聖有作本  
生知於愛敬爰躬履於艱難率天下以為堯喪舉行三  
年之制慕終身而見舜孝度越五帝之隆驚晦朔之屢  
更軫哀恫之一念願副有生之望少寬罔極之悲

孝宗小祥慰太上皇帝表

舜御上賓嗟帝鄉之寢遠義輪右徙驚天道之一周諒  
冠練之初臨結宸衷而永慕中慰恭惟陛下慨思顧復退

宅諒陰雖謳歌獄訟之聲已歸於子宜飭粥齊疏之服  
自盡於親願紓罔極之哀俯就有終之制臣分符輔郡  
阻迹闕庭薦祥莫効於駿奔除重徒深於哽咽

同前慰皇帝表

繼禹道以敬承肇惟元祀躬舜喪而追慕修換終星屬  
周祭之初臨諒聖情之深結中慰恭惟陛下念存夙敬哀

極時思眷燕翼於貽謀服方績舊隆齊綰於承嫡穀既

升新願寢抑於悲恫冀益遵於成德臣同前

寧宗小祥慰皇太后表

神機厭代致喪方謹於三年禮制權宜練祭姑從於易  
月中慰恭惟陛下處心柔順稟德惠慈永懷伉儷之隆尤  
極哀恫之感願少加於節抑以大庇於生靈

同前慰皇帝表

僊御登真甫月輪之既望喪期有數俄歲籥之告周臣  
中慰恭惟陛下義本篤親孝深盡道雖勉從於暮練終難  
抑於哀情願寬罔極之思以慰含生之望

孝宗大祥慰太上皇帝表

僊輿不返莫窮千歲之遊喪服有終倏屆再期之慕諒  
聖情之追遠經時變以興悲中慰中恭惟陛下慕切羹牆感  
深風木雖心非黃屋已貽翼子之謀然躬御縞纓每盡  
喪親之道願抑露濡之感永膺日養之嚴臣無任云云

同前慰皇帝表

蒼梧天遠倏流駟隙之光黃道星回再換龍纏之次愴  
寢遙於祖武諒增慕於宸衷中慰中恭惟陛下孝盡時思恩

隆世嫡敬承禹道有光三五六經之傳躬服舜喪亦既  
二十五月之畢願益遵於成德用俯慰於輿情

寧宗大祥慰皇太后表

三年之制痛方抱於烏號易月而除悵已終於素蹕念  
仙游之寢邈知聖情之難居中慰恭惟陛下保佑功勤付  
託任重宗社大計亦既慶於有祥世俗深悲願少寬於  
無益

同前慰皇帝表

僊遊莫返倏驚流景之遷禮典有常奄及終喪之制感  
時增慕易月從權中慰恭惟陛下授神器之公承宗祧之  
重雖嫫嫫在疚難忘人子之至情然業業萬幾當為天  
下之大計願少寬於宸慮以永御於丕圖

釋服慰皇帝表

風慘雲愁綴衣如昨日周月竟禪服從常中慰恭惟陛下  
誕受丕基率循大卞昊天罔極既盡制於通喪示民有  
終姑權宜而即吉惟聖政作新之始繫民情後戴之初

願抑餘悲以全達孝

同前慰皇太后表

鼎湖龍去雲天莫攀宮隙駒馳日月已竟奄外除而即  
吉酌中制以從常中慰恭惟陛下輔佐先朝憂勤內治感  
今懷昔諒深伉儷之悲順變節哀勉為宗祊之計

元正慰表

周必大

行夏時而正歷荐易歲華履春露以念親益昭聖德凡  
預載持之數共懷怵惕之思中慰恭惟陛下以大孝而顯

揚任姒之徽音以至尊而度越參騫之高行當萬國貢  
珍之在列嘆東朝靈凡之方新佩響唐宮莫展壽觴之  
禮鍾鳴漢殿暫停元會之儀願寬追遠之心茂對履端  
之序臣猥將降指不獲躬詣東上閤門臣無任云云

冬至慰表

周必大

化國日舒徐行北陸聖人孝至永念東朝凡在輿情同  
深孺慕中慰恭惟陛下德隆天性報厚母慈當宮線之初  
添悵褱衣之浸遠率百官而為壽忍虛興慶之彝儀幸

舊宅而會冬益愴永平之故事願抑對時之感俯安率  
土之心

冬至慰表

周必大

望雲氣於觀臺甫驗新陽之至斷鍾聲於長樂莫陳亞  
歲之儀上切哀恫下均感慕中慰恭惟陛下行高文帝孝

邁有虞誦凱風聖善之詩悵六醜之永隔當化日舒長  
之候視一線以增悲仰祈宸抱之少寬式副天心之來  
復

同前

周必大

亞歲甫臨方講漢儀之舊徽音寢遠共深文母之思遙  
知睟穆之光正切哀恫之慕中慰恭惟陛下道同堯舜行  
過淵騫罷長樂之壽觴深悲節物望慈寧之總帳益動  
孝思願寬追遠之懷庶對履長之序

皇太子薨慰寧宗表

趙汝談

皇支殞秀國嗣告凶地驚少海之翻天慘前星之掩矧  
凡黔首能不悼心中慰恭惟陛下道冒群倫仁懷庶類哀

元良之不淑惻慈念以何堪雖寢門常時遂缺三朝之禮然宗廟重事當圖萬世之基願釋聖心以安宮內

皇太子薨慰皇后牋

震宮有變不勝喪七之驚坤載昌寧遂失維城之望

中慰

恭惟殿下母儀德備子育恩深憫羽翼之已成溘霜露而先殞追惟孝愛誠難割於至懷開悟聖聰尚力扶於大計

古詩

祖龍行

韋楚老

黑雲兵氣射天裂壯士朝眠夢寃結祖龍一夜死沙丘  
胡亥空隨鮑魚轍腐肉偷生二千里偽書先賜扶蘇死  
墓接驪山土未乾瑞光已向芒碭起陳勝城中鼓三下  
秦家天地如崩瓦龍蛇撩亂入咸陽少帝空隨漢家馬  
律詩

太宗皇帝挽歌

王元之

卜世知無極上僊安可尋祝堯違衆望傳啓合天心陵

柏蕭騷韻階茅寂寞陰何人開殿閣塵暗九絃琴  
舜化無偏黨堯年欠耄期世間人自哭天上事難知終  
遜東封禮遂成南狩悲金鑾舊學士頭白涕漣漣  
日到虞泉落天從杞國崩去年壽寧節今夕永熙陵薤  
露悲風起松阡苦霧凝龍髯攀不及千古恨難勝

仁宗皇帝挽詞四首

王安石

去歲三朝聖行崩萬國天憂勤無曠古治洽最長年仁  
育齊高厚哀思罄幅員欲知千載美道德冠遺編

憑几微言絕群臣涕泗揮哀號三級陞縞素九重園天  
上仙遊遠宮中御座非最悲帷幄侍不復未明衣

厭代人間世收神天上遊遽然虛玉座不復望珠旒待

旦移巾幘饗人改饕餮

事見羊蛙門

尋常飛白几寂寞暗塵

浮

同軌群方至因山七日催永遠天日表空有肺肝摧帳  
殿流蘇卷鈴歌薤露哀宮中垂曉輶西去不更回

仁宗皇帝挽詞

歐陽脩

王者居尊本無外由來天下以為家六龍白日乘雲去  
何用金錢買道車

又

苦霧霏霏著彩旗猶排吉仗雜凶儀常時鳳輦嬉遊處  
今日龍輜慟哭隨

又

都人擾擾塞康莊西送靈車過苑牆金鼎藥成龍已去  
人間惟有鼠拖腸

又

素幙悠悠逗曉風行隨哀挽出深宮  
妃嬪莫向蒼梧望  
雲覆昭陵洛水東

又

叨陪法從最多年慣聽梨園奏管絃  
從此無因瞻黼座  
惟應魂夢到鈞天

神宗皇帝挽詞

黃庭堅

文思昭日月神武用雷霆制作深垂統  
憂勤減夢齡孫

謀開二葉末命對三靈今代誰班馬能書汗簡青

鈞築叔賢輔天人與聖能輝光唐六典度越漢中興百  
世神宗廟千秋永裕陵帝鄉無馬跡空望白雲乘

昔在基皇極師臣論九疇丘陵忽為谷天地不藏舟河  
洛功無憾幽燕策未收嗣皇朝萬國任姒正興周

孝宗皇帝挽章

朱熹

精一傳心妙文明撫運昌乾坤歸獨御日月要重光不  
值亡胡歲何由復漢疆遽移丹極仗更上白雲鄉九有

哀同切孤臣淚特滂詎因逢舜日曾得廁周行但憶丹  
墀引頻瞻黼座旁來華叨假寵縞素識周喪似有鹽梅  
契還嗟貝錦傷戴盆驚委照增秩侍行香手疏攄丹悃  
衡程發皂囊神心應斗轉巽令極風揚未答隆儒厚俄  
聞脫屣忙此生知永已沒世恨空長內難開新主遄歸  
立右廂因山方慘澹去國又愴惶疾病今如許形骸可  
自量報恩寧復日忍死續殘章

高宗皇帝挽詞

葉適

何止超前代功隆道更尊幾同造區夏還復外乾坤黃  
屋堯年度青山禹穴昏遺民猶望幸淚血洒中原

河濟初開府江淮晚視師纘戎由子聖永命獨天知鶴

唳空虛警雲生仗自移

厭代之夕都下相傳  
有彩雲翔鶴之異

上哀何以

稱卒伐繼周詩

孝宗皇帝挽詞

葉適

儉德加丈景雄謨酌武宣道終遺萬乘喪已盡三年暫  
乞狂胡命常持復漢權今將一孝字高諡百王前

昔年叨上殿歎息動宸襟豈不人思奮其如天意深帝  
王猶遇合南北恨升沉尚有登遐日將軍特賜金

御製寧宗皇帝挽詞

我宋書開洛炎圖統得天年推仁祖久歷至紹興綿孝  
廟鴻謨永光皇寶祚延四朝各三紀盛德洽民編

冲澹凝金永憂勤失寶丹講餘曦已午班促漏方殘濟  
野雲生暗蒼梧日轉寒列朝從藝祖天闕會金鑾

僊御賓空日龍飛杳杳間五霞呈瑞彩九虎敞重關寶

輦扶蒼鶴雲韶擁玉班千年棲佛地今日覩天顏

莊惠皇后挽歌應制

宋庠

嫺幄柔明訓堯闡保護賔別居長樂寢讓給水衡錢謹  
疾方加膳叔神亟去仙宸襟增服紀追報煥終天

昔帝推嬪則吾君賴母慈陪陵漢家塋異室閔宮祠霧  
暗星軒隱天愁月御移翟車參享路無復廟中期

莊獻明肅太后挽詞應制

宋庠

寶慈垂母訓一紀御璿除地有占沙舊天仍補石餘軒

星淪夕緯翟輅去宸居異日金縢啓方知復辟書

皇太后上

僊後於巾箱中得復辟詔書

肝旻身無憚寒暄疾有加災生織女柰魂斷濯龍車廡  
翬浮晨旭邊簫咽暝霞唯留長樂注刊美在皇家

太皇太后挽詞二首

王安石

國賴姜任盛門歸馬鄧高闕睢求窈窕卷耳念勤勞聖  
淑才難擬休明運繼遭岡原今獻卜黼宸正攀號

塗山女德茂京室母才難具美多前志餘光永後觀遺

衣遷館御祖載出宮啟終始神孫孝長留萬國歡

皇太后挽詞

陳師道

德名三后並母道兩朝尊勇決高千古危疑定一言先  
朝還政事隆禮改山園哀挽西郊道雲愁晝亦昏

扶日行黃道乘雲上紫微憂勞形未命恭儉見陳衣布  
德開刑網和戎戢武威要知懷惠處行路涕交揮

隆祐皇太后挽詞

汪藻

四紀居坤極三朝賴母臨德齊先后懿恩及聖君深冊

寶追崇德襄祿欲報心哀榮千古事誰復嗣徽音

慶源由魏國奉事及宣仁盛德儀中壺私恩絕外親長  
秋期不老厚夜忽無晨來歲柔桑綠誰臨蘭館春  
朔漠遐征後南州倣擾時人心憂社稷天意屬簾帷擁  
佑千齡主圖回萬世基中興能事畢倏與帝鄉期

悼懷太子挽歌詞

白居易

竹馬書薨歲銅龍表葬時永言窀穸事全用少陽儀壽  
夭由天命哀榮出聖慈恭聞褒贈詔軫念在輿夷

剪葉藩封早承華冊命尊崖歌辭洛苑風雪蔽梁園鹵簿凌霜宿銘旌向月翻宮寮不逮事哭送出都門

詩話

玉欄賞牡丹

慈聖光獻皇后薨上悲慕甚有姜識者能神術使死者復生上命試其術無效乃曰臣見太宗與仁宗宴臨白玉欄干賞牡丹無復來人間上知妄誕亦不深罪斥郴州蔡承禧挽詞曰天上玉欄花已折人間方士術何施

謂此也



古今事文類聚前集卷四十九

欽定四庫全書

子部

古今事文類聚前集卷四十九

詳校官中書<sub>臣</sub>康綸鈞

侍讀<sub>臣</sub>孫球覆勘

總校官編修<sub>臣</sub>王燕緒

校對官編修<sub>臣</sub>沈清藻

謄錄監生<sub>臣</sub>施華

欽定四庫全書

古今事文類聚前集卷五十

宋 祝穆 撰

喪事部

園陵 葬附

羣書要語天子之賓也敢塗龍輶以棺加斧於槨上畢

塗屋天子之禮也 檀弓顏柳曰天子龍輶而櫛幘 同上子夏

曰聖人之葬人與人之葬聖人也子何觀焉 同上巾車掌

大喪飾遣車遂廬之行注廬興也謂陳駕之行之使人

以次舉之以如墓也遣車一曰鸞車春官遂師大喪共蜃

或作博或作車之役樞路載柳四輪迫地而行有似於

蜃因取名焉行至壙乃說更載以龍輶地官馮相告祲宸

駕長往謝朓鳳翥冊文啓行龍輶在御晏類慕龍輶而不駐

瞻鳳綈以方遙敬宗因山為墳元宗淚為雨於宸極哭

成雷於郊郭同下蘭皋兮背芷陽旌悠悠兮野蒼蒼帶

白花兮掩淚衣玄粉兮斷腸當盛明兮共樂忽幽處兮

獨傷去故庭兮日遠即新宮兮夜長

德宗皇帝冊文擁馳道兮

皆往獨宮車兮不歸

元宗哀冊

假令愚民取長陵一抔土何

以加其法乎

張釋之傳

詩句崇樹加園塋

顏延年拜陵

陵色轉葱青

選

古今事實

橋山劍鳥

黃帝葬於橋山南空棺無尸唯劍鳥在

史記漢武帝因巡

朔方還祭黃帝於橋山上曰吾聞黃帝不死有冢何也

公孫卿對曰黃帝已仙上天羣臣葬其衣冠

史記

舜葬蒼梧

舜葬蒼梧之野有鳥如丹雀名曰憑霄自丹洲而來銜

青沙珠積成壟阜名曰珠丘

拾遺記

水嚙王季墓

惠子曰滕文公卒葬有日矣天大雨雪至半月羣臣請弛期太子不許惠子諫曰昔王季葬渦水之西藥水嚙其墓見棺前和文王曰先君殆見羣臣百姓矣乃出其

棺三日而後葬今太子亦宜曰先君欲少留而撫社稷  
故使雪甚弛期而更為曰此文王義也太子曰善

呂氏春秋

### 虎丘金精

吳王闔閭葬虎丘山下發吳都之士十萬人共治葬穿  
土為川積壤為丘池廣六十步水深一丈五尺銅棺三  
重湏池六尺黃金珠玉為鳧鴈扁諸之劍魚腸之干在  
焉葬三日金精上騰為白虎蹲踞于上因名虎丘

越絕書

### 葬近二陵

秦夏太后卜葬曰東望吾子

莊襄王  
葬正陽

西望吾夫

孝文王  
葬壽陽

驪山侈葬

始皇葬於驪山吏徒數十萬人曠日十年下徹三泉合  
采金石冶銅錮其內漆塗其外被以珠玉飾以翡翠中  
成游觀上成山林為葬埋之侈至於此使其後世曾不  
得蓬顆蔽冢而託葬焉

祭自秦始

古不祭墓始皇起寢殿於墓側漢因不改四時上飯

漢官儀

漢文霸陵

漢文帝治霸陵皆以瓦器不得以金銀銅錫為之因其山不起墳本紀霸陵不起山陵稠種柏樹三輔黃圖將兵護諸

陵

漢官儀

霸陵石槨

張釋之從文帝行至霸陵上使慎夫人鼓瑟上自倚瑟而歌悽然悲懷顧謂羣臣曰嗟乎以北山石為槨用紵

絮斲陳漆其間豈可動哉左右皆曰善釋之前曰使其  
中有可欲雖錮南山猶有隙使其中無可欲雖無石擲  
又何戚焉文帝稱善

為食官令

馮參昭儀少弟以嚴見憚不得親近侍帷幄以王舅出  
補渭陵食官令以數病徙為寢中郎注食官令給陵上  
祭祀之事

復土將軍

文帝遺詔曰郎中令張武為復土將軍發近縣卒萬六千藏槨穿復土屬將軍武注主穿壙填瘞事

得殯時物

武帝崩遺詔以雜道書三十卷致於棺中貯之金箱卷後題東宮臣名年月河東太守張純以書進宣帝帝示左右時有武帝典書中郎冉登見書及箱流涕曰此先皇殯時物臣此時着棺中因何得出宣帝愴然驚愕以書付武帝廟中其茂陵宛然如故庾信賦云茂陵之書

空聚即此也

內傳

珠襦玉匣

漢帝及侯王送葬者皆珠襦玉匣形如鎧甲連以金鏤

匣上皆鏤以蛟龍鸞鳳龜鱗之象時謂蛟龍玉匣

西京雜記

九竅加以黃金則死者不朽

晏類要

盜發諸陵

赤眉賊帥樊崇陷長安發掘諸陵取其寶貨凡所發有玉匣殮者皆如生故赤眉多行淫穢唯灊陵杜陵完五

代溫韜在梁為耀州節度唐諸陵在境內者悉發之取  
所藏金寶而昭陵最固悉藏前世圖書鍾王紙墨筆迹  
如新莊宗滅梁韜來朝郭崇韜曰此劫賊罪不可赦韜  
納賂劉后遽遣還鎮明宗時賜死

### 裁令流水

光武初作壽陵

自文帝以後  
皆預作陵

將作大匠竇融上言園陵

廣袤無所用帝曰古者帝王之葬皆陶人瓦器木車茅  
馬使後代之人不知其處今所制不過二三頃無為山

陵陂池裁令流水而已

掃地露祭

明年遺詔無起寢廟園陵掃地露祭率天下以儉

天祿辟邪

後漢靈帝時鑄天祿蝦蟆吐水於平門外注今鄧州南陽縣北宗資碑旁有兩石獸鐫其膊一曰天祿一曰辟邪據此即天祿辟邪並獸名漢天祿閣亦因獸以立名右漢天祿辟邪四字在宗資墓前石獸膊上按後漢書

宗資南陽安衆人也今墓在鄧州南陽界以墓前有二石獸刻其膊上曰一曰天祿一曰辟邪余自天聖中舉進士往來襄鄧間見之道側迨今三十餘年矣其後集錄古文思得此字屢求於人不能致尚書職方員外郎謝景初家於鄧為模得之字或訛缺不若余見時完也

歐文

既葬隋亡

隋文帝仁壽二年皇后獨孤氏崩上令儀同三司蕭吉

金史卷五十一  
為皇后擇葬地得吉處云卜年二千卜世二百上曰吉  
凶由人不在於地高緯葬父豈不卜乎俄而國亡正如  
我家墓田若云不吉朕不當為天子若云不凶我弟不  
當戰沒然竟從吉言吉退告族人蕭平仲曰後四載太  
子御天下若太子得政隋其亡乎吾前給之卜年二千  
者二十字也卜世二百者取世二傳也汝識之

詔從儉約

唐太宗貞觀十一年詔恐身後子孫習於流俗加四重

之觀伐百祀之木崇厚墳陵今頒此制務從儉約於九  
峻之山足容一棺而已木馬塗車土槨簫簫事合古典  
不為時用

詐望昭陵

長孫皇后既葬太宗即苑中作層臺以望昭陵引魏徵  
同升徵視曰臣眊昏不能見帝指示之徵曰此昭陵也  
帝曰然徵曰臣以為陛下望獻陵若昭陵臣固見之帝  
泣為毀臺

縣奉八陵

寶曆元年勅奉先一縣獨奉八陵供辦支措實為繁併  
宜委京兆府減一半租并雜色役令諸縣均出

敬宗  
實錄

蘭亭殉葬

見字  
學門

紙斂瓦棺

五代周太祖屢戒晉王曰昔吾西征見唐十八陵無不  
發掘多藏金寶故也我死當衣以紙斂以瓦棺勿作石  
羊虎

寒食出祭

奉先之道無寒食野祭之禮近代莊宗每年寒食出祭

謂之破散

五代會要

劉知遠殺李從益王淑妃曰何不留吾

兒使每歲寒食以一盂麥飯洒明宗陵乎

五代史

宋朝陵名

太祖昌陵 太宗熙陵 真宗定陵 仁宗昭陵 英

宗厚陵 神宗裕陵 哲宗泰陵 徽宗佑陵 欽宗

寧陵 高宗思陵 孝宗阜陵 光宗獻陵 寧宗茂

陵  
理宗穆陵  
度宗安陵

皇堂棟損

仁宗永昭葬且有日忽傳皇堂棟損時諸使皆欲不聞而掩之韓公琦正色曰不可果損當易之若違葬期侈所費此責猶可當若苟且掩之後有壞而致人主疑心

臣下何以當責

遺事

書責時宰

仁宗山陵韓魏公為使時國用窘匱而一用乾興故事

或以為過蘇明允為編禮官以書責公至引宋華元厚  
葬事以為不臣魏公得之矍然已乃斂容起謝曰某無  
狀敢不奉教然華元事莫未至是時聞者無不服公大  
度能受意外之言也

石林燕話

### 擅移山陵

入內押班雷允恭擅移永定陵皇堂而丁謂兆之朝廷  
命呂許公與魯肅公乘傳按視盡得其迹及允恭等盜  
没方中金寶以萬計狀聞抵允恭罪而謂罷相

護葬訖去位

韓魏公嘉祐末以翊戴功輔英宗既為永昭山陵使事畢而上不豫矣不敢辭位越四日而永厚鼎成以元宰復護葬於洛魏公先自上疏云自有唐至于五代山陵使事訖求去今先帝已祔廟而臣時為山陵使事恬然不能援故事去位則是不知典故何以勝天下之責雖陛下欲以私恩留臣顧中外公議且謂臣何神宗再三留之卧家不出遂以司徒兩鎮節度使判鄉郡相州元

祐末章子厚為求泰山陵使子厚專權人情鬱陶有曾  
誕敷文者作詞畧云草草山陵職事厭厭罷相情懷謂  
故事也紹興間會稽因山秦會之為固位之計乃除孟  
仁仲為樞密使以代其行仁仲不悟其機事畢猶入國  
門會之怒諷言路引以論列出典金陵

揮麈錄

### 山陵非宰相護送

永祐之權殞也宰相秦會之不欲行乃命信安孟王忠  
厚以樞密使為之及營思陵備置五使遂命右相周益

公掩殯宮從所請也時左相王季海以母老惡凶事故不欲行然陵成而王卒罷永阜之役既命左相留仲至未葬而仲至逐右相趙子直亦不欲行乃以少傅保寧軍節度使郭師禹為總護使而命參知政事余處恭持節導拜梓宮既葬師禹封永寧郡王子直遂得罪慶元末永崇陵將復土右相謝子肅亦不行乃命平原王韓侂胄馬山陵非宰相護送遂為故事

朝野  
雜記

### 權名殯宮

紹興初昭慈聖獻皇后升遐欲建山陵外祖曾公議以謂帝后陵寢今存伊洛不日復中原即歸祔矣宜以殯

宮為名僉以為當用之

揮塵錄

### 古今文集

雜著

女媧陵記

喬潭

登黃龍古塞望洪河中流巋然獨存大浸不溺者媧皇陵也夫巨靈劈太華蹠首陽導河而東以洩憤怒雖有

重丘大阜險狹之口罔不漱之為黃壤汨之於旋波不  
可復振奔崩而下矣女媧氏已葬之後豁然之衝天險  
東阨風濤鼓作乃能中乾外禦特立萬年其憑神可知  
也水無盈縮之度陵有高卑之常霖潦漲之兩涘沒矣  
於是乎不為之小而就其深旱暵滲之孤嶼出矣於是  
不為之大而就其淺非夫巨靈壯趾以固本河伯高肩  
以承隅胡然動靜如因其時升降不失其則羅浮二岳  
以風雨合離蓬萊三山以波濤上下不復故道遂違常

流甚相遠矣君子曰夫能屠黑龍涸九州況乎一水之上而自為謀夫能斷鰲足立四極況乎數仞之高而自為力神人之異昧者難知密邇山谷森羅物象莽莽蘆渚寧非止水之餘嶄嶄石林猶有補天之色搖演空曲精靈若存且夫上無積草表以孤樹常感風氣纖條悲鳴若冥應盼嚮鼓簧而吹笙由是憧憧往來無不加敬山有梅栗關吏羞焉水有菱芡舟人奠焉塚之木無或斬焉陵之土無或抔焉是則馨香已陳而樵蘇自禁矣

故聖人取薄葬去厚送驪山之銀海魚燈虎丘之金精  
龍劍錮之其內散之其間適為大盜之守未是藏身之  
固彼橋山帝丘九疑會稽皆因山而墳未聞其赭者余  
謂媧皇受命在火火以示水谷不為陵開門負固日用  
其力不然其隙地豈必封崇乎是故觀其制志之為城

塚後記

文粹

諫厚葬疏

劉向

棺槨之作自黃帝始黃帝葬於橋山堯葬濟陰丘隴皆

小葬具甚微舜葬蒼梧二妃不從禹葬會稽不改其制  
殷湯無葬處文武周公葬於畢在郛東南無墳壠逮至  
吳王闔閭違禮厚葬十有餘年越人發之及秦惠文武  
昭襄五王皆大作丘壠多其瘞藏咸盡發掘暴露甚足  
悲也始皇葬於驪山之阿下錮三泉上崇三墳其高十  
丈周回五里有餘石槨為游館人膏為燈燭水銀為江  
海黃金為鳧鴈珍寶之藏機械之變棺槨之麗宮館之  
盛不可勝原又多殺宮人生埋工匠計以萬數驪山之

作未成而周章百萬之師至其下矣項籍燔其宮室塋  
宇往往咸見發掘其後牧兒亡羊入其鑿牧者持火照  
求羊失火燒其藏擲自古及今葬未有盛如始皇者也  
數年之間外被項籍之災內罹牧豎之禍豈不哀哉

諫山陵厚葬書

虞世南

臣聞古之聖帝明王所以薄葬者非不欲崇高光飾珍  
寶貝物以厚其親然審而言之高墳厚壠珍物畢備此  
適所以為親之累非曰孝也昔漢成帝造延昌二陵制

度甚厚功費甚多諫大夫劉向上書孝文寤而遂以薄葬又漢氏之法人君在位三分天下貢賦以一分入山陵武帝歷年長久比葬陵中不復容物霍光暗於大體奢侈過度其後至更始之敗赤眉賊入長安破茂陵取物猶不能盡無故聚斂百姓為盜之用甚無謂也魏文帝於首陽東為壽陵作終制其畧曰昔堯舜壽陵因山為體無封無樹無立寢殿園邑為棺槨足以藏骨為衣裳足以朽肉吾勞心不食之地欲使易代之後不知其

處無藏金玉銅鐵一以瓦器自古及今未有不亡之國  
無不掘之墓喪亂以來漢氏諸陵無不發掘及至燒取  
玉匣金鏤骸骨并盡乃不重痛哉若違詔妄有變改吾  
為戮屍於地下死而重死不忠不孝使魂而有知將不  
福汝以為永制藏之宗廟魏文之制可謂達於制矣伏  
願陛下深覽古今為長久之慮臣之赤心惟願萬歲之  
後神道常安陛下名揚於宗廟耳書奏不報

狼石銘

皇甫湜

狼石蒼蒼驪山之傍鏡朴礪癡疑然西方昔秦皇帝謀  
之不臧七十萬人茲焉惶惶發石此山言礎於墳若有  
憑依屹住中達淫刑就迫人力無施故老相傳以狼名  
之自昔大石不封不樹有葛於溝有新於野後聖有作  
緣情不忍為之棺槨其在唐虞則維窾木噫嘻暴秦虐  
用其人墳而象山下錮三泉窮珍摠奇力瘁財殫驅之  
而前如刈草菅天毒其衷神憤其凶謫戍一呼九州風  
從白挺荆棘指麾峭嶮險阻不闔干戈倒鋒屍露于劫

燔燔于童蓬顙無依不十年中禹葬會稽不改其行聖  
德洋洋厥饗久長至于漢劉釋之有言中如可欲猶隙  
南山矧私其身以盡其人刻詞狼石炯戒千春

漢帝葬儀

天子葬幙中黃門虎賁各三十人執紼司空擇土造穿  
太史卜日將作黃腸題湊便房如禮大駕太僕御方相  
氏黃金四目蒙玄衣熊皮朱裳執戈揚楯立乘四馬朱  
軀旂長三仞十有二旒曳地畫日月升龍書旐曰天子

之樞謁者二人立乘六馬為次太常跪哭曰十五舉音  
止哭晝漏上請藝司徒河南尹先引車騎太常曰請拜  
送車著白絲三糾紉長二十丈圍七寸六行行五十人  
公卿以下子弟凡三百人皆素幘委貌冠衣素裳挽校  
尉三百人皆赤幘不冠持幡幢皆銜枚羽林孤兒巴俞  
嬖徒直切歌者六十人為六列司馬八人執鐸至陵南羨  
門司徒跪請就下房都導東園武士奉入房執事下明  
器太祝進醴獻司空將校復土續漢書

宋朝陵名犯前代

紹興己未春徽宗梓宮歸宰臣上陵名永固有王鉉者  
言犯後魏明帝後周文宣二后陵名下秘書省參考如  
鉉言遂改名永祐然漢平帝後漢殤帝十國劉龔同曰  
康陵本朝順祖亦曰康陵後魏明帝後周宣帝唐中宗  
同曰定陵本朝翼祖亦曰定陵前漢惠帝唐懿宗王后  
同曰安陵本朝宣祖亦曰安陵唐太宗曰昭陵本朝仁  
宗曰永昭陵後魏宣武后曰永泰陵唐元宗曰泰陵本

朝哲宗亦曰永泰陵蓋本朝陵名犯前代陵名者不一  
祖宗以來不避也

聞見錄

古詩

橋陵三十韻

杜甫

先帝昔晏駕茲山朝百靈崇岡擁象設沃野開天庭即  
事壯重險論功超五丁坡陀困厚地却略羅峻屏雲門  
虛冉冉風松肅泠泠石門霜露白玉殿莓苔青宮女曉  
知署祠官朝見星空梁簇畫戟陰井敲銅瓶中使日夜

繼惟王心不寧豈徒卹備享尚謂求無形孝理敦國政  
神疑推道經瑞芝產廟柱好鳥宿巖扃高岳前律萃洪  
河左滢潏金城蓄峻趾沙苑交迴汀永與奧區固川原  
分眇冥居然赤縣立臺榭爭岩亭官屬果稱是聲華真  
可聽王劉美竹潤裴李春蘭馨鄭氏才振古啖侯筆不  
停遣辭必中律利物當發鈿綺繡相展轉琳瑯愈青瑩  
側聞魯恭化東德崔瑗銘太史侯鳧影王喬隨鶴鵠朝  
儀限霄漢客思迴林垞輾軻辭下柱飄飄凌濁涇諸生

舊短褐旋泛一浮萍荒歲兒女瘦暮塗涕泗零主人念  
老馬廨宇容秋螢流寓理豈愜窮愁醉未醒何當擺俗  
累浩蕩乘滄溟

始皇陵下作

曹鄴

千金買魚燈泉下照狐兔行人上陵過却弔扶蘇墓累  
壘壙中物多於養生具若使山可移應將秦國去舜沒  
雖在前今猶未封樹

七哀詩

張孟陽

北邙何累累高陵有四五借問誰家墳皆云漢世主恭  
文遙相望原陵鬱膻膻季世喪亂起盜賊如豺虎毀壞  
過一抔便房啓幽戶珠匣離玉體珍寶見剽虜園寢化  
為墟周墉無遺堵蒙籠荒荆棘蹊逕登童豎狐兔窟其  
中荒穢不復埽頽墮並墾發萌隸營農圃昔為萬乘君  
今為一丘土感彼雍門言悽愴哀往古

感興

蘇子美

後寢藏衣冠前廟宅神主吾聞諸禮經此制出中古秦

嬴舍先法乃復祭於墓漢文以月遊於道蓋無取宣帝  
尊祖廟失制徧九土孝元酌前文一旦悉除去魏帝樂  
銅臺遺令置歌舞昏嗣竟從之此事狂夫阻唐制益紛  
華諸陵鎖嬪御曠女日哀吟於先亦奚補吾廟三聖人  
乘雲不可覩威靈已霄漢嗣皇念宗祖繪事移天光列  
象肖神武徧勅舊遊地輸材起宮宇階城飾以金墻壁  
衣之黼功既即奉迎法仗疊簫鼓玩好擇珍奇目奪不  
可數三京佛老家已有十數處朝家雖奉先越禮古不

許君不祭臣僕父不祭支庶丹楹豈非孝聖貶甚蕭斧  
大祀當以時寢殿即其所惜哉恭儉德乃為侈所鹽痛  
乎神聖姿遂與夷為侶蒼生何其愚瞻歎走旁午賤子  
私所嘆傷時淚如雨

豐陵行

韓愈

羽衛煌煌一百里曉出都門葬天子羣臣雜沓馳後先  
宮官穰穰來不已是時新秋七月初金神按節炎氣除  
清風飄飄輕雨灑偃蹇旂旒卷以舒踰梁下坂笳鼓咽

帶嶽遂走玄宮虛哭聲訇天百鳥噪幽坎晝閉空靈輿  
皇帝孝心深且遠資送禮備無贏餘設官置衛鎖嬪妓  
供養朝夕象平居臣聞神道尚清淨三代舊制存諸書  
墓藏廟器不可亂欲言非職知何如

題奉先寺

張文潛

荒涼城南奉先寺後宮美人皆葬此角樓相望高起墳  
草間柏下多石人秩卑焚骨不作塚青石浮屠當丘壠  
家家墳上作亭亭朱門相向無人聲樹頭土梟作人語

月黑風悲鬼搖樹宮女養女作子孫年年犢車來作主  
廢后園林官路側家破無人掃墳域官家歲給半千錢  
街頭買餅作寒食

律詩

行次昭陵

杜甫

舊俗疲庸主羣雄問獨夫  
識歸龍鳳質威定虎狼都  
天屬尊堯典神功協禹謨  
風雲隨逸足日月繼高衢  
文物多師古朝廷半老儒  
直詞寧戮辱賢路不崎嶇  
往者災

猶降蒼生喘未蘇  
指麾安率土盪滌撫洪鑪  
壯士悲陵邑幽人拜鼎湖  
玉衣晨自舉石馬汗嘗趨  
松柏瞻靈殿塵沙立暝途  
寂寥開國日流恨滿山隅

古蛾眉怨言漢武事

王翰

宮車晚出向南山  
仙衛逶迤去不還  
朝晡泣對麒麟樹  
樹下蒼苔日漸斑

仁宗昭陵有人題此詩  
韓子蒼云不著姓氏  
宜表而出之

農桑不擾歲常登邊將無功更不能四十二年如夢覺  
春風吹淚過昭陵

詩話

吳臺逢後主

隋煬帝初葬吳公臺下後大唐平江南改葬雷塘吳公  
臺在揚州以陳將吳明徹得名在江都縣西北四里  
雷塘在縣東北十里按大業拾遺載帝昏酒滋深嘗行  
吳公臺下恍惚與陳後主遇後主云每憶張麗華方憑

臨春閣作璧月詞未終見韓擒虎躍領萬騎直來衝人  
便至今日始謂殿下致治在堯舜之上今日還此逸遊  
曩時何見罪之深也帝叱之不復有睹故東坡號國夜  
遊圖詩云人間俛仰成今古吳公臺下雷塘路當時亦  
笑張麗華不知門外韓擒虎

金粟岡

唐舊紀明皇朝拜五陵至橋陵見金粟山岡有龍盤鳳  
者翬之勢復近先塋謂侍臣曰吾千秋萬歲後宜葬此地

聲斷催仙馭一去隔千秋遊人重到曲江頭事往涕難  
收空餘御幄傳觴處依舊水東流

倦游錄

古今事文類聚前集卷五十